

ALAHADY FAHA 21 MANDAVANTAONA - B



“Tompo ô, hankany amin’iza àry izahay? Ianao no manana ny teny fiainana mandrakizay ”.

Ry Kristianina havana, mbola tohizantsika ny fandalinana ny Eokaristia miainga amin’ny Evanjely Joany 6 zay manambara ny famantarana nataon’I Jesoa dia ny fampitomboana ny mofo ka niainga avy amin’izany izy no nampianatra ny fanorenana ny Eokaristia loharano sy fototra ny fiainantsika. Anatin’izao fiainantsika ny vokatry ny filankevitra pastôraly izao isika no mihaino ny fampianarana lalina izany. Tafintohina tamin’ny fampianaran’i Jesoa ireo jody ka androany kosa henontsika fa tsy ireo jody ihany no nomonomonina sy tafintohina tamy fanambaran’I Jesoa momba ny tenany izay mofo velona avy any an-danitra sy fihinanana ny vatany ary fisotro ny ràny fa maro tamin’ireo mpianany koa. Amin’izao fotoana izao dia manao ny fampianarana koa ny mpanara-dia an’I Kristy. Taitra ireo nandre an’I Jesoa tamin’ny fotoanandrony fa tsy mbola misy lehilahy miteny sy mampianatra toy azy, matotra ny fampianrany, tsy vitany fampianarana ihany noataony fa misy famantarana ka nahatsapa izy ireo fa tsy manao kobaka ambava izy ary izany koa no mbola anaovany fampianarana matotra androany.

Maro ireo vahoaka nanaraka an’i Jesoa noho izany fampianarany izany kanefa tao amin’ireo vahoaka

ireo dia nisy noho ny famantarana ihany ka rehefa tsy hitany intsony ny famantarana dia lasa izy ireo tsy nanaraka an’I Jesoa intsony fa nanaraka zavatra hafa. Mbola hitantsika izany amin’izao andro iainantsika izao. Tamin’ireo nanaraka an’i Jesoa na dia tsy nisy aza ny famantarana nisy ihany koa ireo azo lazaina fa mpianatr’I Jesoa, mpihaino azy ary nahaliana azy ireo ny

Vakiteny I : Jôh. 24, 1-2a. 15-16 sy 18b
Tononkira : Salamo 33
Vakiteny II : Efez. 5, 21-32
Evanjely : Jo. 6, 61-70

fampianarany fa eto dia ireo mpianatra ireo koa nisy tafintohina ary lasa niverin-dàlana. Fantantsika fa misy izany amin’izao androntsika izao, naheno ny fampianarana, nandalina ny finoana, io ilay hoe vita raha jibaby dia lasa niverin-dàlana ka tsy nanohy ny fandalinam-pinoana intsony.

Amin'ireo mpanara-dià an'i Jesoa misy ihany koa ireo mpianatra nanaraka ary nandalina ny finoana, anisan'izany ilay tovolahy nanontany hoe "inona ny ataoko azahoako ny fiainana mandrakizay ?", izay ihany koa tamin'ireto mpianatra nahita ny famantarana tamin'ny fampitomboana ny mofo sy ny fampianarana nataon'I Jesoa dia nanaraka nefa rehefa nolazainy fa izy no mofo mahavelona avy any an-danitra ary tena fihinanana ka hahazoana ny fiainana mandrakizay ny vatany sy ny ràny dia tafintohina satria sarotra amin'izy ireo ny nahazo ny dikan'ny fampianarana izany ka lasa izy ireo.

Misy tamin'ireo mpianatra mpanara-dia an'i Jesoa ireo atao hoe apôstôly, mpanara-dia an'i Kristy akaiky izay hitantsika amin'ny Evanjely androany ka i Md Piera no nisolo vava izy ireo rehefa nanontany I Jesoa hoe ary ianareo mba ahoana? namaly i Piera nanao hoe "hankany amin'iza izahay ianao no manana ny teny fiainana ary izahay efa nino sy nahalala fa ianao no ilay masin'Andriamanitra", fiekem-pinoana izany ary mahatonga antsika ho iray ao amin'i Jesoa sy mahatonga antsika taranaka mpanorina satria mitoetra ao amin'I Jesoa sady itoreran'i Jesoa, finoana izany. Ny finoana tokoa no mampiombona amin'I Jesoa fa tsy zavatra hafa n'oviana n'oviana

Ny fiainana sy fitoerana amin'i Jesoa no tena finoana, hifikitra sy hiaraka amin'i Jesoa ka mahatonga an'ireo ho Jesoa velona sy mpiara-belona amin'olona amin'izao fotoana izao. Fampianarana lehibe ho antsika ny voalazan'I Piera sy ny fiekem-pinoana nataony.

Ny vakiteny voalohany dia mampahatsiaro ny mety azo lazaina ho "loharanon'ny fiekem-pinoana", nanavao ny fiekem-pinoana ny vahoaka, mila safidy ny finoana ary izany no lohahevitra omen'ny Eglizy amin'izao Alahady tsotra faha 21 mandavantaona izao : mahay mifidy sady mivelona izay fidina. Izany no antenaintsika lalina dia lalina amin'izao aorian'ny filan-kevitra pastôraly izao. Hitoetra ao amin'I Jesoa isika sy itoerany ka hamokatra be, raha mifanombo isika.

Ny mahatonga antsika mikorontana ohatry ny voalaza ao amin'ny vakiteny voalohany ka nilaza i Josoa ; aiza ary isika ity, inona ny ataontsika ? Izany no nataontsika tamin'ny filankevitra pastôraly mba hahatonga antsika ho taranaka mpanorina, hanorina ny EOY sy ETA ka hanavao ny fifandraisantsika amin'Andriamanitra sy samy olombelona ary amin'ny zava-boahary. Ka io no fanorenana tontolo telo dia ny tontolo iainana hanajantsika, hiarovantsika ary hanatsarantsika, handavorariantsika ny zava-boahary manodidina antsika ka hahatonga ny tontolo iainana maitso ka hamelona antsika.

Ny tontolo tena efa potika dia ny tontolom-piainantsika samy olombelona, izay anjakan'ny ny fialonana, ny fitiavan-tena, ny fanapotohana, fandravana sy fanilikilihana ireo manodidina antsika ka havaozintsika miaraka amin'I Kristy izany tontolo izany mba hitoeran'ny fanajana, hanjaka ny rariny sy ny hitsiny ary ny fahamarinana ka entintsika mampivoatra ny fiainantsika andavanandro,

Eo koa ny tontolom-pinoana mba itoeran'I Jesoa sy itoerantsika ao aminy, handalina ny finoantsika isika ka haneho ny maha zanak'Andriamanitra antsika ka ny famindram-po sy ny famelan-keloka no handrindrantsika ny fiaraha-monina misy antsika ka hiadam-pinaritra isika araka ny teniny Papa : tsy ho hisy na oviana na oviana ny fiadanana raha tsy ny famindram-po sy ny fifamelon-keloka no entintsika amin'ny fifandraisana eo amin'ny fiainantsika.

Izany no dikany fanompoana dia ny fampanjakana sy fanorenana ireo tontolo telo ireo izany hoe manompo ny Tompo Andriamanitra araka ny voalaza amin'ny vakiteny voalohany, mampiova ny

fifandraisana ao anatin'ny fifampitokisana sy fifankatiavana araka ny ampianarin'i Md Paoly ao amin'ny vakiteny faharoa androany izay anambarany fa ny loharano sy ny fototr'izany rehetra izany dia ny Eglizy kely fianakaviana ka aoka ho Kristy tokoa no eo anivon'ny fianakaviana ka zary Eglizy kely tokoa ka ny Eglizy kely manorina ny Eglizy fiombonana, ny Eglizy fiombonana manorina ny Eglizy fototra ary ny Eglizy fototra manorina ny Eglizy iraka ka hahatonga ny fanjakan'Andriamanitra hihitatra sy hihatsara eo anivon'ny fiainantsika.

Ry Jesoa Tompo ô, nampianarinao anay fa ianao tokoa no tenin'ny fiainana, maro ireo izay nanodidina anao lasa nandao anao ary nalain-kino izy ireo koa ampio izahay mba ho tahaka an'i Md Piera hanambara tsy amin'ny teny fotsiny fa amin'ny fiainanay manontolo fa ianao tokoa ny safidinay, ianao no manana ny teny mahavelona, enga anie izahay ho famantarana izany teny mahavelona izany eo amin'ny fiainanay ka hahafahanay hizara amin'ny hafa izany teninao izany.

Enga anie izahay ho tena EOY na inon-kidona na inon-kiatra, ianao irery ihany no fiainanay, ary ataovy miray hasambarana sy hiray aina ao aminao izahay amin'ny fiainanay ety an-tany ka hatramin'ny fiainana mandrakizay ka hahatonga anay ho tena taranaka mpanorina ETA sy EOY ho vavolombelon'ny teninao eo anivon'ny fiaraha-monina misy anay ka hiadam-pinaritra ao aminao tokoa izahay. Amen

Mompera Arseveka Mgr Benjamin Ramaroson